


地350.291

138

29

鎮南州志 壬

藝文略	卷十
文集	
記	序
雜著	
賦	詩
補遺	



鎮南州志略卷之十

藝文略

班孟堅因劉歆七略勅為藝文志隋唐而下諸史皆踵為之至貴與馬氏作經籍訂文理之純駁俾覽之者味其品題即可粗窺端倪誠哉

殫見洽聞之一助也夫歷代之憲章存乎典籍而一州一邑之掌故亦具在書冊則州縣志乘安可無藝文之志哉

鎮南自元明以迄於今列為內地幾五百餘年聲明文物埒於中土一時積學之士著有專集古文之家垂為記序

鎮南州志

卷之十藝

文畧序

推之論著詩歌郁郁彬彬足以資考鏡而備觀覽矣作藝文略首文集次記次序次雜著次賦次詩凡六篇



文集

謹案鎮南自元明迄於我朝文教聿新著作之家應不止一二惟地處荒僻傳播實難詳加採訪僅得文藝五種但有其名而無其書謹載之篇首亦不沒人之美焉耳

鏡心篇

愉老強學集

枕流野韻

以上三種明舉人張如鳳著集亡

淡淡篇

國朝舉人夏丕彰著集亡

學記

國朝歲貢張達賢著集亡

記

舊志八篇增補
六篇凡十四篇

瑞應橋記 卽平彝橋 明分守道 張壁

州治西五里許爲白龍河接弄棟諸水頽洞演瀉數百里而東匯孔道亘起天塹中分先時架木爲橋夏秋間霖潦則眾谷奔湍震蕩洄涵渺焉斜梁懸水斷山星渡間造舟爲梁而威楚人不習橈楫致沉沙腹魚不可勝數乃頽河腴田萬畝實灌溉資焉然溢而患者又什三農與商蓋交病矣州守周君匡廬名品聞始至出霹靂手握旋境內咸

鎮南州志

卷之十 藝文畧記

勇行而誠格之既周諏輿圖陂池原溼川壑之勢先築堰通渠以防河溢已復濬李子灣一帶悉匯橋下使支流入而會流有所洩土膏至是去墊溺無鮫人患矣守旣去所以病穡者益計所以病涉者詢謀諸父老子弟僉謂非墊石不可垂久顧州當西事之後帑無羨積野無蓋藏守不忍罷勞才遺驅之咄嗟潛盼間慨然於築舍之謀立斷一朝遂捐俸百餘金量材徒度餼糧鳩工鑿石錮山首所事事士氓感而踴躍子來爭先後哀其資又若干金一時羣獻藝機運梯乘始於辛丑之秋越明年冬竣役橋長十五

丈廣半之兩岸延袤各一十五丈其倍之左右有欄岸西
有亭顏曰小憩時絡繹而來乎徒者負輿者載躡蹻而游
旌者嚮之旅顏破而龐眉信也是歲橋畔陳生國謨田產
嘉禾有一莖四穗者二穗者並穗者及蕭生振芳家牛生
雙犢皆並見一時恤寺綠蘿江公貼詩紀其事薦紳先生
屬而和者盈帙遂以名橋曰瑞應從異徵云先是不穀銜
命南詔經其地輒謂守苦心業爲蒿目握籌而佐其費已
而州人丐所以記石者夫疇謂蜀險守能平之籌謂漢廣
守能濟之惟守斧藻與神明伍而喘息與閭閻通蓋已保

罔凝和胞胎萬彙逐帝之寵貺而靈承之致嘉禾瑞犢呈
奇兆禎此助信助順之說也昔張君淑守漁陽麥秀兩歧
黃次公守潁川鳳凰神雀數集天子下璽書賜黃金百鎰
爵晉關內侯然則迤以西從此長無事矣夫秀麥視嘉禾
孰多而並犢視鳳雀較實守方以治行高等考政太宰氏
今令甲獎興吏治一昉漢制賜金晉秩此其秀乎且以詔
後有土者睹津達康莊此昔之蹇裳而急帷者阡隴週廻
而沃饒此昔沮洳而敗殖者生齒之熙熙曰舒以長此昔
之劬勞所貽而乃深仰止者瞿然惕若衷思以保乂之母

遇佚前休謂守之功繼自今與霄壤俱可也因綴其概而
系之以銘銘曰驚濤絕澗疾霆奔漢誰通金堰獨橫銀棧
矯矯遊龍南度牽牛負鰲飛楹接蜃危樓紛紛冠蓋漾渤
鳴璆利涉成梁主政之首卓哉瑞應吏治孰偶問之化工
化工不有咨爾小民歸之郡首郡首不知曰惟何有勒此
貞珉用垂不朽

重修鎮南州學宮記

國朝知州 岑鶴建平人

皇上御極之二十年寇逆以次削平溥海內外罔不嚮化念滇
南遠在天末久罹兵革

鎮南州志

卷之十藝文畧記

三

特勅有司修學宮典文教攝州事者以空文報竣殘缺如故癸
亥十二月鶴備員謁廟俯仰踧踖時事孔亟不遑謀始丙
寅之春爰葺其腐朽漫漶者整新之足以駿奔走舉祀典
而已落成之日

宸翰適頒龍峯鳳翥拜瞻悚惶乃進諸生而告之曰二三子亦
知

聖天子崇儒右文之意乎人才者治亂所從出學校者人才之
所從出也唐虞三代以來先王之制什不存一惟學校歷
數千年至於今不廢豈徒然哉吾黨羣焉奉聖人爲之師

明晤咕嗶以戈取富貴誦誦然入而膠庠出而膺任以是
爲學吾未見其可也終身竊儒者之名其究爲小人之歸
以至凶于而國害于而家者比比然也學者不患才之不
廣患志之不立舜蹠之分何啻天壤皆自雞鳴之一念基
之始於不可見至於不可揜終於不可救以後人而觀前
人未有不嘆息痛悼者躬自蹈之以爲固然亦可悲矣夫
執其皆有者以爲論途之人可以爲聖賢充非義之類則
賢人君子不免有時爲穿窬辨之於早謹之於微以庶幾
不大悖於聖人之道是在學者勉之而已雞和雖荒微農
苟有志何地之足云諸生以爲然於是乎記之學博許誦
易門人楊增祿豐人州尉楊兆位楚之黃陂人是役也皆
與勞焉法得備書

重建廣福寺玉皇閣記

岑鶴

廣福寺當州治之中規制巋然官民祝釐於此蓋建自宋
元其來久矣佛殿後高閣三級崇祀上帝雄麗甲一郡明
季丙戌沙賊之亂燬焉自後兵革相仍迄無謚歲故址榛
蕪過之有泣下者數千百年崇奉至尊之地忍令與劫灰

同盛昭格之謂何按形家言州在四山中非有主星坐鎮之不可閣之廢興關州人之否泰又其餘也寺山門湫隘近市常住無香火資養噴寂然鶴待罪未三扶傷救做日不暇給心識之而口不敢言丙寅夏秋之間與州尉楊吏目後先將以遷秩去用是怒焉憂之茲閣之災閣兩朝矣前人之闕後人之責也使後人復委後人其何日之有於是集州人士告以不敢假易之意捐薄俸爲倡經始九月之三日度地拓基鳩工庀材戛戛乎難之未幾斧斤奮鏹之如雲若有不知其然而然者閣高巍勝於昔環其下爲

洗心宏道集喜三堂共十五楹天君殿六楹鐘鼓樓各一右廂文昌宮拓山門爲坊者三垣墻階地惟周以謹凡六閱月而成工不病費民不言勞嗚呼州民之困於水火久矣人窮則呼天疾痛則呼父母情也是役也豈僅以觀瞻告成事此邦之人苟以其翻然勃然之誠改惡從善以爲祇承上帝之實剝極而復其在茲乎父老云閣之被災也迦葉尊者徒跣於市大呼救火旣而曰四十年後當復今閣之成實符其期由此觀之豈人力也哉先後董其事者土州同段光贊陞任州尉楊兆位收放錢糧吳憲章楊爲

棟楊騰鳳功居多焉工竣勒石詳備始末以告來者鶴拜
手稽首謹記而銘之曰於昭上帝臨下有赫惟善是輔人
窮而返帝星憫焉翼翼新宮絳霄雲旗媚於上帝非仁無
親非法無聖我今稽首惟誠乃格赦而不怒小民之私涕
泗歸命凡茲邦人無狃不慝尚永念哉順帝之則

見性山記

國朝知州

陳

元餘姚進士

鎮南之古寺凡八率皆廢落榛蕪所謂蒼鼠竄古瓦者也
惟城北十五里有新刹見性山峰巒聳秀林木鬱翳殿廡
外池園亭榭粗備逼鄰響水河溪流瑩潔余題以冷松咽

鎮南州志

卷之十藝文畧記

六

石之額蓋實錄也聽政之暇輒單車遊覽信宿不忍去住
持僧道讓乞記於余余答以措大家安知黃面瞿曇事但
山名見性與吾儒宗旨頗合因卽余性所領略者呼諸比
邱於前而說法曰者滿山青紅碧綠飛鳴坐卧皆是也爾
不聞法雨晴飛去天香晝下來一去一來便是性不可遏
抑處溪聲可作廣長舌山色無非清淨身便是見性處梅
子熟時卽心卽佛以見爲見也色空空色無無明盡以不
見爲見也認得真著衣吃飯都是這個若不入三昧而徒
朝夕課誦其去性也遠矣山舊無名因開山僧讀世尊感

經有夜觀明星而見性之語故名而寺亦仍其名焉寺建於康熙甲辰春鳩工庀材閱一年而落成嗟夫是山崢然起於莽蒼之中其始怪石錯雜豺豹虺蜴所盤遊耳惟僧起而闢之爬苔剔蘚居然摩尼七寶且廣置常住田東邑白衣雙旬多租俾僧食自足其斯地以人興者與僧號直往州之丹桂鄉趙氏子也初習儒食餼庠序有聲其弟名普持者亦披緇苦行可稱無著天親弟與兄嵩邱蘭若古今並美矣

鎮川橋記

陳元

王制辰角見則除道天根見則成梁爾雅云隄謂之梁石在謂之筒其小者曰權曰杓周禮司空氏掌之古大夫采風問俗每以橋之興坻規政務之得失而世俗不察猥以修橋濟物爲浮屠家功德豈不謬哉吾寅友段君襄字明於從政者也世爲州司馬有恩德及人君尤練習時事所條畫興釐多中可念城南有大河發源苴水合注白龍川灌漑萬頃州人賴之但山溪陡漲則橫流沖激寒裳而涉津者卒遭沈溺君憫之謀於前州守李公建橋以便行者未幾李公陞擢段君以力不支遂輟役閱己卯三月君謂

善念不可中止手

持

李

刺史募緣疏一帙遍

告官紳士庶

大興工作迄今告竣曾謂余言開工之始人力千餘無下
礮處夜夢金甲神指示始得天然石腳雖曰巧匠琢山骨
蓋亦有神助焉是役也經始於辛未之冬落成於庚辰之
夏越十年而始完段君之焦勞其志堅忍其力備厯風雨
寒暑爲邦人造福概可見矣嗟夫鎮南自罹兵燹後民之
凋瘵也久矣余蒞任以來自擊衝疲之狀區務安民而噢
咻之方將闢汗萊招流移蘇徭役興學校而君能除道成
梁以廣利涉斯眞識爲盼之先務而卒佐余之一得也已

是爲記

遊黑泥溫泉記

陳元

予守鎮南之二年行部至英武鄉有山曰黑泥孤危一徑
輿馬不能入懸崖坂木而登峭壁削立俯闕溪流一線有
墜石森列如劍戟從容皆股立行二里許始得平阜寬廣
盈畝可勝坐對望清流涓滴不絕乃溫泉也泉之名有四
最高者曰鸚鵡潭在山絕頂人跡罕到次日天蓬潭潭上
石擎如華蓋旁穿一小孔亦瑩潔可愛又次日象鼻潭奔
瀉如瀑布最下曰馬槽潭則遞注匯流之所也山罅多石

洞林木鬱翳有夷婦數十羊裘裹足避匿於此予怪詢之
土人則曰自洱海趙州來欲浴者予笑謂友人曰浴陰之
泉漢天子幸焉驪山之泉楊大真浴焉斯泉之秀澈香潤
僅供猓獠爇彝之濯足山川遭際之不同乃至此耶昔柳
州作馬退山茅亭記有曰蘭亭也不遇右軍終湮沒於荒
郊蔓草今吾與二三子梯登幽壑之巔澡雪瓊漿之畔使
非作賦能詩表章勝跡則斯泉之浴士大夫與浴猓獠爇
彝何以異元也不文以俟君子

郊行紀略

陳元

康熙四十年辛巳二月四日子奉檄查勘田糧自州城行
三十五里爲沙橋堡額設堡夫三十名上下差役如織予
作勞勞歌以慰役者初五宿新鐵廠廠爐臨河冶器用水
沖擊風箱不須人力煙燄滿天亦坎離旣濟之義也初六
行三十里經舊鐵廠又五十里至寶滿跨一望黃沙白草
毫無春意有羅武苗數十披羊氈擊手蹀足夾道跪迎是
晚宿老土判陳逸民署初七早發至阿躡郎盤旋九折而
上查猓麼黑麼二苴田須臾白山腰橫向訪耆宿李新甲
李君曾教授永昌予贈以門聯有康成學富生書帶子美

風高築草堂之句初入至團山龍泉寺莊田之一也寺本在城西十餘里春月茶花爛漫竹木森布住持嫌遊人沓至一夜伐去花竹子駭其性之乖戾也答二十以當棒喝何如僧號明珠敢與時相同名予改曰明心初九再宿團山初十行二十里進洗澡塘有遊黑泥溫泉記浴畢出車河口羊血地抵大藏當宿小藏當凡三宿越十一二十二三日遊三家村至偽中書莊查磨碑母波田十四至阿者衣達十五至樹密鮮是夜月明如晝適貢士羅宏章年六十餘謁來謁羅乃猓獮種授予以蠻語饋予以胡笙教小奚童學夷嬪吹笙跌足爲樂登樓長嘯山鳴谷應興致奚減庾樓老子耶十六宿阿腦十七至直底跨有瘴氣疾行至阿底溝楊秀才家稅駕焉楊生具雞黍餉予乘間自敘其譜系父翹棟明選進士割股療親有孝行高祖母何氏祖母李氏柏舟矢節享年百有八歲予嘉楊氏世有令德爲作節孝合傳勒珉邑乘夫闡幽光以砥末俗官斯土之責也十八亦住阿底溝十九至玉屏庵訪諸太監諸係沐府舊闢遭變結跏於此予擬向白頭宮人問天寶遺事適太監遠出未回甚悵惘二十日劫簪花界水界二十一

查大小德郎田薄暮俱憩玉屏庵二十二策馬渡江阿雄
鄉居民江內江外各半此則中分白鷺處也沿江而上至
牛叢止土巡檢家二十三二十四住柳得村二十五二十
六住沙糖郎俱馬生莊所馬族回回也然多讀書守禮者
爲州中四大姓之一二十七值清明節予踏青詩有曰二
月榴紅映碧峰醽醽薄酒醉花叢後一聯云飯熟不嫌噉
小米圍肥偏愛摘雞蓂繼而山人有以蕨菜水花菜佐饌
者味更在雞蓂之上二十八至背籠二十九至袁家村三
十初一至大波羅初二至小波羅初三至鑄鍋營村計自
起行至今已而一月山中無雜髮者瘥不能忍對鏡照影
彷彿太白白髮三千丈矣初四入永盛廠看英雄銀礦侵
晨已戒行矣有子衿二十輩遮擁馬首不得前爭來載酒
問奇扳予止僧舍乞詩索字者魚貫迭進至夜分猶劇談
浮白了無倦容蓋在月朔之初五六七等日也初入諸生
餞飲玉皇閣旋假道英雄之哈喇而回初九入州境謁宗
甸初十返州署是役也抑豪右均賦役大抵田無定則臨
江築壩者厥賦上上在深菁高阜者厥賦中下閱三十有
六日清出隱佔秋糧一十三石有奇馬上口占詩八首作

記序各二歌行一

倉聖祠記

國朝訓導

張 誕

鎮南一邑楚屬之首州也靈鍾盤山苴水之盛秀發文筆
椀閣之雄自明以來代有作者是亦文人藪也惟是各廟
俱備而倉聖廟獨之非缺典也緣其祠舊設於文昌祠後
自嘉慶壬戌歲奉文崇祀文昌先代而倉聖祠爲文昌後
宮每值祭期則移文昌二代正位以行典禮至祭倉聖而
遷移者復然是則倉聖不安文昌先代不安卽我文祖之
神亦大爲不安也余乙丑秋贊鐸茲土同齋樂友感額以

是告余曰此我二人所刻不能安者州人士能晏然安乎
於是相與捐貲鳩工庀材建祠於文昌宮後東北但捐助
無多規模粗備物力尙屬維艱樂友與余大費經營始得
莊請聖位入祠行祀典焉至宮牆黝堊廟貌輝煌仍未有
也迄稟署府王學憲譚皆樂爲捐助於是始加工修飾莊
嚴稱壯觀焉竊意斯舉也非學憲本府不能收其成論者
動推學師二人之力所致而不然也蓋惟神有靈默使學
憲本府以完成之自此文星朗耀可爲我諸生之預兆也
願諸生共勉之是役也自丙寅季冬厯今年餘始獲告竣

創造艱難未可付之泯沒不彰也爰備述其顛末而爲記

遊鸚鵡山記

歲貢 廿 雨 姚州人

山川景物古今事變觸目皆可興懷特非置閒身於靜境則物與我遇我與物忘熟視若無覩者往往有之光緒丁亥春杪余司訓瀘西兩月致仕歸道經鎮南以親故款留小住十餘日時方炎暑苦無以避客有指城西鸚鵡山招余往遊者余喜從之出郭徐行里許陟其巔清風徐來炎蒸頓改相與脫帽披襟坐長松下縱目四望近則珠盤北峙苴水南環雉堞參差畎畝縱橫一時山川景物咸爭奇

鎮南州志

卷之十 藝文畧記

三

獻媚於茲山之下遠則五樓峭聳王載元張明亭之所眺吟也石鼓嵯峨南詔東爨之所戰爭也天城五摩之險馬寶之所蟠踞也關灘呂閣形勢雄奇則段功楊淵海之所出奇制勝大破明玉珍之師者也今也事歸烏有而青山如故一登眺問古今事變已悠然入吾胸次回憶瀘西之遊往返千里所過名山勝地不可勝紀然皆過而不留與吾心渺無交涉茲獨觸目有懷何歎遊心物外其身閒其境靜也繼自今退老田間屏棄一切月夕花朝春秋佳日邀二三知己戴箛笠著芒屨手提詩囊香橈往遊於筆架

飽煙蘿間身愈閒境愈靜其觸目興懷又當何如也

重建龍川書院記

舉人甘仲賢姚州人

嘉慶十有七年知州蘇世勳建書院一區於文廟之東規制宏厥棟宇崑嶸榜曰龍川義取龍川江之所發源也咸豐庚申回逆煽亂付於祝融及州城克復當事者經營民莫未暇為茲事計後雖有留意文教之人或因事勢之阻生掣肘之虞感旁撓之議將作復止者屢矣光緒乙酉冬西蜀蔡明府來牧斯土下車伊始接見都人士卽詢曰州中講學有人乎曰有有地乎曰無假館乎曰僑居佛寺公

慨然曰工居肆以成事士無地以修業將曲藝之不若耶吾為君輩籌之未幾屬都人士而告之曰得矣昨檢舊案有公租一款舊係貼辦來往差徭今夫馬裁免數年來徒飽私囊與其填無厭之欲壑何若培有造之人文吾將稟之大府君輩勉為之勿疑勿怠卽捐俸金五十兩為拓址肇基之費擇都人士之老成者董其役明達者勸其事曉會計者徵其租賦鳩工庀材拓舊基建正廳三楹講堂三楹左右橫舍大門稱是方經始之曰公呼匠人而囑之曰樽櫨榱桷勿取其華取其固垣墉階砌勿取其美取其堅

窗楹戶牖勿取其麗取其明松柏之材擇龐鴻飢甍之屬
棄髻墾可謂計之周而慮之遠矣其初浮言競作眾議旁
撓公竟置之弗問可謂見之明而持之確矣丙戌之冬工
將告竣都人聚而言曰公啓我宇庀我土類育我人材培
我元氣如公之德是謂不朽宜勒貞珉垂之永久公曰無
譁各勉爾業絕垢離瑕蜚聲金馬以光我

國家僉曰唯唯造福無窮子孫食報以祝我公公印之模字範
青蜀之遂甯人也董其役者州庠生劉君澤遠郭君兆燿
也勩其事者廩生張子實賢高子承先劉子榮生也而紀

鎮南州志

卷之十藝文畧記

五

其事者僑寺講學之人姚州甘仲賢也

遊白龍寺記

甘仲賢

光緒甲申館於鎮南每暇時登城四覽見夕陽西下處林
木蒼蔚半爲峯巒所掩問之友人曰此白龍寺也亟欲探
其勝而不果十月朔晨後邀友人出城西約五六里別大
道遵微行循坡田而上田盡路漸崎嶇然山不甚高人無
難色里許而陟其岡回顧城郭村墟歷歷如布几席而不
暇悉數也越岡而下峯回路轉黃葉滿谿松陰瀉翠野鳥
啾嘈寒蟬答語不數武抵寺門入門有犬狺狺繞堦而吠

迺歷重階登佛堂瞻如來像有老衲白髮蕭然自西廂出
迎延入啜茗叩之茫無解悟友人曰何闇若彼而壽若此
也余笑曰其不解不悟而得享高年者正以不解悟爲解
悟也使彼有解悟之資則將奪於嗜欲以促其壽至今日
其骨已朽尙得與吾輩接小住緣耶友人曰善日西斜矣
曷歸乎遂歌因過竹院逢僧話偷得浮生半日閒之句別
老衲尋舊徑而回

遊三層樓記

舉人甘叔賢姚州人

歲乙酉予教讀鎮南州署閉門不出者月餘閒讀宋史司

馬光傳其獨居私語未嘗忘天下憂國之心千載如揭不
禁喟然動嘆頃主人來前邀遊三層樓予乃置卷偕往自
署左東行數折而北有樓巍然拔地而上者約七尋有
餘位居州城之中央城狀如船孤樓聳立如桅其棧題垣
牆俱塵積不鮮蓋元季明初所建也拾級登之至其初層
恢闊深闇無甚異狀再陟之則昂然矣更極力登至三層
光明洞朗軒窗四闢西望鸚鵡北望兩旂東望金雞南望
龍頂舉城內外無有障目礙觀者其欲合仍離不斷如縷
則山巔之雲氣散也迷離隱約青光動搖則城隅之煙柳

垂也徐徐飄來煖淡肌膚則樓外之和風入也主人願予曰樂甚予俯首不答主人曰何也予曰不見夫廬井蕭條蓋無完瓦峙無完牆而不能蔽風雨者乎居民之不樂孰甚不見夫蒿萊滿野町無柔桑隴無秀麥而不能爲衣食者乎農夫之不樂孰甚不見夫踟躕道旁欲進不能欲退不可而計窮於謀生者乎商旅之不樂又孰甚蓋鎮南於咸同之間回匪煽亂滿地干戈斯民之不聊生也久矣今雖大難肅清而瘡痍未復其彫敝之形亦與吾姚同安得慈惠之師保養生息一登仁壽之域使人皆樂業則吾兩

人者以千萬人之樂爲樂而後可以云樂千萬人皆樂吾兩人之樂而並可以不言樂夫不言之樂不係於斯樓也則登樓而樂不登樓而亦樂矣嗟乎不齊者時命難卜者行休予不暇樂吾子之樂也愧不能憂古人之憂而已主人聞予言悄然若有憂色旋攜手而歸時四月八日也

重建學宮記

舉人甘季賢姚州人

鎮南學宮創自前明永樂七年凡四遷乃定今地席坎面離惟其位也咸豐十年回匪搆亂州城陷沒宮被燬焉難平庠中人呂君海樓銳志興建抗稟當事發給公款爲木

土之費不足則倡兩庠捐貲益之又不足則州紳宦蜀之
劉君鍾璟以銀千兩助之爰相其位置差其先後計日肇
工樑棟雲興瓴甌山積凡工之斤鋸者雕鏤者治埽者丹
牘者及執雜役而奔走者罔不力故閱月正殿成閱月兩
廡立又閱月戟門闢泮池鑿宮左之魁星閣建峩峩翼翼
蔚然改觀士慶於庭曰廟學舉矣民忭於野曰廟學舉矣
夫學校興則禮義立禮義立則風俗厚忠臣義士往往而
在州學以有明肇建教澤涵濡且二百餘年當鼎革之際
流寇鴟張干戈滿地吾意必有激昂大義奮不顧身以留

人道於幾希者乃披閱舊志於忠義一門闕焉豈亂世崩
離文字殘缺歟抑修志者考撫未備爰泯沒而無聞歟光
緒己丑彼都人士延余兄應堦重修州志羅舊聞採近事
於咸豐十年之變得殉難者八十餘人或以水死或以火
死或以罵賊死或起義兵討賊死或以助官軍攻勦陷陣
死出於明道讀書者十之七出於武夫戰卒者十之三各
爲立傳至今讀之凜凜有生氣焉而後知前明之泯焉無
聞者非無人也蓋逸之也學校之關係世道人心其重且
切如此宋盱江李觀撰袁州學記有曰天下治則譚禮樂

以陶吾民一有不幸尤當仗大節爲臣死忠爲子死孝非徒弄筆墨以徼利達而已

朝家教學其此意也夫其此意也夫往余攝龍川書院講席張君舉卿郭生理初屢道呂君修學之力求余言爲記余遲遲未有以報非敢緩也蓋有待也州人誠不忘呂君卽以是勒諸瑣珉也可

遊南州第一泉記

甘季賢

光緒丁亥余館於鎮南閨四月十九日課徒稍暇偕友人出東郭遊不數武至古井屯見草翳塵穢中累如負土而

鎮南州志

卷之十藝文畧記

十九

上者石檻也瀏如溶漾而出者井泉也友人指而告曰是井也甘冽異常舊爲吾鎮諸泉之冠有亭翼然其上榜曰南州第一泉登探者往往而在余曰異哉胡盛名之不可常恃有如斯乎似君之言則昔者亭高而廣淵深而涼文人學士來往而不絕洵勝槩也夫泉甘則土必肥野芳爭發佳木鬪美風露挹清霜雪增潔計沙礫土塗堆積無有也計荆棘蓬蒿蒙翳無有也故人皆得隆其名而驕之衆泉而今安在哉且余亦嘗憑弔古今勝蹟矣他不具論漢光武中元元年醴泉出京師唐貞觀六年醴泉出仁壽宮

闕亭臺之壯麗動聖上之親臨邀詞臣之紀錄彼其一時
盛名卓著匪直百倍於斯泉已也而承以兵車蹂躪煙火
焚燎與漢唐俱滅亡而無存矣而況斯泉乎而況斯泉之
負郭鎮南數經兵燹乎莊生曰直木先伐甘井先竭斯泉
源裕澤長幸以不竭而亭臺竹樹化爲禾黍邱墟昔爲文
人學士之所珍重今則樵夫牧子皆得易而侮之已無復
知爲南州第一者夫使實亡而名不屬於泉何憾乃至實
存而名不彰不得不爲斯泉發一慨也古來豪傑顯晦升
沈倘亦斯泉之轉徙無常耶友人喜而笑爰攜手同歸至

室而爲之記

序

舊志一篇增補
五篇凡六篇

南城奎星閣序

陳元

吾鄉先生陽明子以言事謫龍場驛初至無署居東峰石
洞先生卽其地築君子亭何陋軒以倡明良知之學至今
石刻尙存鎮南之去龍場又二千餘里予歷牂牁過碧雞
而入濮落蠻之國疑其風土荒陋必有倍蓰於龍場者及
抵境則見城堞壯麗車轂絡繹於是山水則有七村十八
盤之明秀人物則敦詩守禮不異中華幸哉地雖遠而不

陋而特慮官斯土者不能以君子之道自治以治人爲可
恥也予蒞鎮之明年興除粗舉因以其暇與州學弟子員
蒐討文藝多士問奇踵至舊以文昌宮爲義館湫隘不能
容會學博段君司訓李君謀創書院於南城樓上建奎閣
以肅觀瞻夫奎木宿也木生火有文明之象焉而好事者
遂倡爲黠額踢斗符祿福利之說怪誕恍惚儒者所不道
吾所望於諸生者豈徒襲干祿之文冀博青紫云爾哉蓋
將敦崇實學以求進於君子也昔漢司馬持節入滇滇人
盛覽張叔從之受經文教始開夫相如特詞賦之雄耳尙

有志振興儒教流風徼外而況學陽明之學者哉

鎮南州志序

陳元

鎮南歷無專志良以地處濮蠻風仍鄙陋蕪焉無足紀述耳雖然運會有盛衰時勢有遷轉州之往事無論已卽如吳逆之變馬寶踏踞天城州境皆戎馬場也鋒鏑所至村落爲墟幸賴

天兵蕩滌妖氛民始喁喁有更生之樂伏覩數十年來蠲租之

詔屢下肆赦之

鎮南州志

卷之十藝文畧序

三

恩頻頒其大者尤在屯賦減則驛堡蘇困勳莊裁併有司他如重農育才興釐畢舉氣運蒸然丕變尙欲以細奴邏之故址少之可乎嗟夫民猶是民也昔何以鳥駭獸散今何以接踵來歸予所以特表而出之蓋欲此邦之人知今日之流移復業含哺而歌太平者皆由我

聖天子柔懷萬里而一二封疆大吏又能宣布

皇仁拊循濡育以挽此厄運也由今弔昔一切沿革損益之故瞭然在目則州志之作烏可已哉爰掇拾舊文擴撫近事與學博諸紳士參互考訂上溯星野之次舍中列城郭山

川關峭壇墳財賦學校官師人物之盛下逮禽魚草木產
類之微旁及幽芳逸跡詞章雜咏洪纖略具創為一書以
付諸梓吾聞滇志始自晉常璩厥後韋皋竇滂李君王穀
諸君子補苴潤色簡帙雖備元迂疏寡陋何敢上擬前哲
惟是述見聞之粗迹為一隅造端譬彼繪事先施粉素若
丹雘而黝堊之則猶有未也

鎮南州志序

訓導 李猶龍 雲南
縣人

雲南視中州為陋鎮南視雲南為益陋雖有地理弗傳也
雖有建設賦役弗傳也雖有秩官人物藝文弗傳也間有

鎮南州志

卷之十 藝文畧序

三

傳者猶未滿乎什一也姚江古愚先生來牧是邦余以青
甕得侍左右嘗聞先生之言曰南滇軼事頗多可採雖遐
荒野史語近不經然徵之先輩撰述與吾身所歷亦有不
虛者是在著書人深思之而心知其意耳況今之時民風
日變士行漸修縱曰江山如故城郭宮室關梁如故昆蟲
草木如故而人物之盛藝文之工豈無後來居上者哉爰
於癸未冬置酒公堂招諸僚屬及此都人士而命之曰纂
修鎮南州志甚勝事也諸君其各書所聞所見以備採擇
可乎僉曰唯唯書甫呈先生揮筆如風繁者刪之缺者補

之俚者文之卽以授之梓人爲鎮南山川人物生色多矣
陋云乎哉董工告竣敢贅一言殊愧續貂云

重修鎮南州志序

督學 楊式穀 河南人

鎮治地舊名久舍唐宋屬蠻疆元始內附改名鎮南州明
仍之然風氣未開人物固屬寥寥州之有志創自我

朝康熙初年其時吳逆甫平版圖新人然山川城池田賦官
制物產等固已可得而志矣今又涵濡

聖化近二百載學校藝文之盛應增益者頗多而舊志復漸卽
殘缺壬子春余輶車過境聞州人士將請於署州牧華君

鎮南州志

卷之十藝文畧序

二四

有事重修也是年秋功成諸生赴省闈者攜書乞序於余
余曰風俗隨世教爲轉移今之時去始志幾何年而增科
名若干人增文學若干人增節孝若干人增義行若干人
從此日盛一日居斯土者相與扶持大道講明正學漸而
漬之優而游之夫安知後之勝於今不更倍今之勝於昔
耶州牧華君慨然舉此亦修廢墜厲風俗之意而諸生遂
協力補輯成編余甚樂其事之相與有成也於是乎書

重修鎮南州志序

知州 華國清 四川人

鎮南舊志創自康熙初年其時版圖新入風氣未更可供

採輯者寥寥無幾茲又百八十餘年矣簡斷編殘漸歸磨滅補苴增益烏能已乎辛亥歲于權篆斯牧期年學中人咸以續修州志爲請予聞而難之何者滇南去

京師萬里鎮南尤僻處一隅前志旣採輯無多今卽有所增補亦從可知矣然人才不擇地而生風俗每因時而易我朝教化覃敷凡在要荒者莫不涵育薰陶蒸蒸日上變況鎮人隸輿圖之內其漸被爲甚深也哉微論士習詩書農安耕鑿翕然有中土風卽婦人女子亦皆粗知大義扶植綱常又烏得以邊城少之耶夫人有善行弗克表章於世竟淹

鎮南州志

卷之十藝文畧序

五

沒於荒煙蔓草之中使後之人無從激發善心相與樹人倫而培風化此亦守土者之過也志中惟科名節孝文學義行較前爲盛亦以見人才之衆風俗之純良非偶然予故不畏其難而樂從其請是役也始於孝廉陳君諸人而秉筆者則鹿城明經劉君之力居多予僅樂觀其成不敢冀以爲功也

重修鎮南州志序

歲貢

劉

階

楚雄人

聞文家必宗史漢而祖左國廼可上窺六經虞夏之文渾渾尙已二典者敬天勤民分職之書禹貢者山川田賦物

產之書左傳國策國語漢書史記則志地志人志事之書
所爲方策者是方策有所布而後人道有所敏文也而政
在焉政在民時而若昊天政在民居而寶土地政在厚民
生正民德而重建設政在節民財恤民力而謹賦役有秩
官而政得其理有人物而政見其成至藝文可風蒸蒸乎
化行而俗美故以其天文地理爲一書以其建設賦役秩
官爲一書以其人物藝文爲一書書道政事書佚而政荒
政成而書始非參之太史以著其潔未易附方策而備採
風也文家云爾壬子寓鎮陽鑑溪州伯續修志蓋非惟政
之成而書之成矣與參焉因以其所聞者述於簡

書劉氏捐置書籍清冊後

知州 李毓蘭 遂甯人

光緒己丑之秋余以補授此邦時方履任竊見覺宮壯麗
旁建書院亦復軒窗通明洵讀書樂地也特是地方僻陋
文教素弛兵燹之餘書籍益缺縱有讀書好古之士難免
不抱憾面牆且惜且慨適有劉君少璞者前四川瀘州直
刺璞生公之哲嗣捐貲購覓經史一千九百餘卷由蜀專
運回籍并殷勤以書致余備述仰承乃翁遺命特成先志
請余賜印札發書院俾資誦閱此其有益於鄉人士身心

性命也豈淺鮮耶璞翁以名貢士分發吾鄉文章經濟至
今在人耳目今其人已古而象賢如少璞者卒能繼志述
事冀興文學於梓桑於此卜璞翁書香之永真堪綿延百
世也鎮南科第不盛溯自璞翁登籍後邠金之族登賢書
者代不乏人未必非璞翁詩書之澤有以振興厥後也爰
書於此不沒人善儻有居今稽古互相珍惜安見漢夷雜
處之邦文風不蒸蒸日上也余爲誌之非惟彰劉氏之美
亦爲州人士之能讀書者深幸誦法有資且旨哉

雜著

舊志一篇增補
三篇凡四篇

條陳屯糧議

明舉人 俞汝欽 楚雄人

先年本衛成規凡百戶所舉役以三分差操七分屯糧其七分每軍一名蠲田一分納秋米九石二斗夏稅出於陸地田有定畝軍有定數故田俱墾而糧易完自成化宏治以來或為官旗隱占不行納糧或捏報民田改作民田賣與別姓糧數雖如舊而畝數則大殊於前矣各軍亦屢會具告或年數大遠無從稽查或查出欲斷田還伍而所報

鎮南州志

卷之十藝文畧雜著

天

民糧又無歸著或雖無二者之患而水衝沙壅堰廢溝壞礙費多無人修復故每田一分該租穀二十石今只得二三石或五六石者有之至于陸地則侵占變賣為日已久到今大半全無而麥糧虧賠尤甚此田數之不能復舊而水利之不能如前其弊一也又在昔分撥之多寡高下豈能盡均而到今之潤燥肥瘠安能無別故租足償而糧無累者亦豈盡無然不過十分之二三耳其實租不及三之一而賠每倍之者甚多其弊二也先年田各有軍領種近則逃亡者漸多田雖存而無軍領者過半矣夫田無人

領則佃戶無主非甚獲利卽易拋荒彼見存者尙納本名猶且不足已田未闢何暇爲人乃今凡管屯者並拋荒逃亡之田派使賠納每軍賠至十餘石或二十石者有之情豈能堪也於此不爲減處恐逃者不復思歸而在者亦欲就逃矣此軍數不能如舊而見當者爲累滋深其弊三也每年各軍管屯則由所以至衛皆有年例管屯指揮並干戶出詣在外各倉復有下程各軍費用先已數兩雖在上有禁并間有不受者然已成故事不能永革也是以納糧之銀半爲無名之費此糧所以不易完其弊四也糧不盡

完則管屯官不免住俸官謂爾糧不完而住我俸各軍恐其移怒咸以完糧爲緩而補俸爲先是以糧銀暗爲補俸之用此糧之所以常不完其弊五也近年督催嚴明拖欠者視昔雖少然其中殷實者無幾或賣產業或鬻子女者多無賣無鬻卽以逃爲上矣故一伍僅存三五丁或七八丁者亦有之非以累益重而益不堪故相率而逃以至此歟欽生長此方深洞其弊舊欠未償新徵復繼鎖拷監禁殆無虛時誠有不忍坐視者查得安甯易門等所除膏腴照舊承納之外凡衝壅崩塞乾薄拋荒并逃亡之糧令納

折色減作三錢并二錢者俱有之定爲常年災傷處之甚
詳行之已久碑石現存近歲本衛徐潮周輔二百戶伍亦
比前例具告已蒙減徵則各伍凡係虧賠之糧事體相同
何爲獨異而忍其有偏累也哉乞自一伍查之以及各伍
其有丁多之族人眾易湊雖賠不累者不必再處外其丁
少之戶賠累不堪者俱照前例一體減之不惟調停尤足
蘇困此固一法也又屢相訂議莫若參酌有司徵收事例
各軍革去管屯名色每伍立一人如縣之里長并幫催者
一人管屯官出帖二人散帖俾各軍執帖依期親納其有
過期不完者并二人責治之則各軍有休息之期無管屯
之累而在官亦杜年例之擾私費旣省斯公事亦完矣除
在城倉糧原係指揮等官同收外其在外各倉只許本所
百戶同有司官一員詣彼地親收不許指揮千戶復出侵
擾蓋相繼往催徒應故事各軍便有下程供俸之資費且
有司之糧收止一官各伍分徵其數卽少固不在多員也
除百戶照舊其餘免令再往爲便至於管屯官之俸非累
拖欠太多姑免其往則在軍旣止下程之需又省補俸之
用爲費少斯供賦漸易矣又先年移本衛中左二所於騰

荷其遺留未去仍住成家者大約今近百丁其馬步伍中
餘丁頗多編差每剩者俱太逸各令清出不許隱漏總計
各所虧賠之數若干令前項人丁每名每認一石之數免
出襍差尤爲兩便蓋在此納數石則在彼卽輕數石矣況
又不止數石乎如此庶輕重適均勞逸不遠雜費旣裁完
納尤易此又一法也如蒙准呈伏乞批行屯田道委公正
能幹官員專主其事遍歷其地其虧賠秋糧夏稅同各伍
百戶踏勘細查從實回報查照安甯徐周二伍事例一體
從減徵收其餘弊法從長議處務求折衷以次釐正迨處

分既定之後乃勒一碑示爲永久之規不許後官肆意變
亂庶軍困可蘇糧亦易完存者不復思逃而逃者又思復
業矣惠溥於一方澤垂於永久厥功豈小補哉

謹案此文載在陳元舊志而劉階刪之以其事不專係
鎮南也豈知左前二所原隸楚雄衛當日屯政之弊楚
雄如此鎮南可知讀此文可
以觀世變矣故仍入選焉

州城說

陳元

予聞之父老云州城似船自岑使君建玉皇閣以鎮之如
船有桅始無飄蕩之患予周覽形勢信然獨是舟之平傾
何常權在操舟者社稷金湯乃造舟之具農桑學校治人

事神爲維舟之器廣積儲詰奸宄防舟之滲漏恤力役通水利疏舟之壅滯夫而後風正帆懸安流無恙否則鯨波駭浪皆能乘不意以危我舟也可不慎哉可不懼哉

義田說

國朝進士

陳封舜州人

何以聚人曰財況聚族乎余家始遷祖均祥公以軍功授州倅世職繼繼繩繩十有六代蓋四百年於茲鎮南稱望族焉子姓繁衍析產而居榮枯豐嗇之殊致亦勢所必然也夫天下之疲癯殘疾惇獨鰥寡皆吾兄弟之顛連無告者詎以祖宗同氣數十百年休養生息噢煦而貽謀之親

鎮南州志

卷之十藝文畧雜著

三

親顧隔膜視之乎今幸博一第食祿

皇家握百里之符慚無報稱按九族之譜時切解推且雞和貧瘠十居七八而陳氏宗族竭蹶於餬口者尤多夫孫叔敖之子不免負薪任彥昇之兒至於衣葛路人悲之矣用是蒞陵四載節存養廉六百金封寄來滇置田百餘畝歲可收租五六十石計本族遠近約二百餘口小康者不必急需食力者勉強自贍其貧窶艱難者不及百口議於每歲四月初十日恐懼栽種十二月二十日恐難度歲開倉接濟一次大口十六歲以上一人分穀三市斗小口十五歲

以下卑之老病孤寡則倍之大槩一年必需租穀三四十石目前力不充裕欲速反不成功定於乾隆十七八九年冬散一次積至乾隆二十年以後四臘兩月照數相濟可以源源不匱雖屬一杯之水莫救車薪之火然而田飛白鷺無策以鞭土牛鄰獻椒花乏術以送窮鬼假此升斗聊濟然眉我本支之老成者其曲體而助理之

龍磨角說

甘仲賢

友人朱君麟徵嘗言鎮南之東北山中境地絕雅羣峯環拱一水帶縈灌木陰翳處有石壁高二丈廣倍之壁上五

色爛斑滑膩如拭相傳昔有龍磨角於此因名其地曰龍磨角仲賢聞而爲之說曰竊聞龍之有角者虬無角者螭磨於此者其爲虬龍無疑矣然龍之磨其角也其必有所用之也變化風雲上下於天龍之所自用也噴沫爲霖救涸榮枯人之所待用於龍者也龍之所自用與人之所待用於龍者皆於角乎無與無與於角無用於角也無用而磨之龍不幾謬乎或曰坤上六云龍戰於野其血元黃其戰也或如牛羊之抵觸有用於角亦未可知而爪牙又將徒具矣不然古有祭龍氏不聞覓砥礪以供其用豈今之

龍大異於古之龍哉余又聞鎮南舊名石鼓縣以石爲鼓不可擊也亦未嘗有擊之者也未嘗擊之而仍以鼓名其亦有類於是歟

賦

舊志一篇增補
一篇凡二篇

火炬賦

舉人 陳以忠 州人

繫五方之異域兮亦四時之推遷考芳辰於六詔兮徵軼
事於南滇有星回之令節兮誌習尚之相沿家燔柴而共
執兮戶列炬而高懸因錫號曰火把兮為風俗之流傳當
六月之廿四兮採嶺上之松脂木之伐而斤運兮薪之析
而斧斯捆擬許行之為屨兮烽嗤褒女之相嬉既暴之以
朝日兮又烘之以夕曦感良辰之已及兮負良夜而奚為

鎮南州志

卷之十藝文畧賦

三五

及斜暉之沒彩兮趁暮影之朦朧燈未張夫舍北兮燭不
舉於堂中燃薪火以四照兮周屋角與墻東疑珊瑚之火
樹分映琉璃之屏風疑火齊之照灼兮徹院宇而皆紅迺
分持乎兒曹兮逮僮僕而各足相徵逐於衡宇兮共喧闐
於巷曲逞燄燄於街衢兮爭烈烈於流俗天半燦其朱霞
兮光輝普而遍燭似星點之整斜兮奚紅螢之斷續始熠
爛以景彰兮繼輝煌而滋蔓火雲擁而星流兮火龍翔而
霧噴或行列以相聯兮或隊分而息遠豈秉燭以夜遊兮
方白晝而不遜聽雜沓之笑語兮識歡呼之眾願非徒

之堪傳兮又何以相沿於戶萬緬往代之流風兮稽故老
之遺聞謂諸葛之平蠻兮南人待而情殷曾燃炬於此父
兮迎渡瀘之三軍遂相傳為故事兮誌向化之欣欣逮南
詔之跋扈兮誘鄧睽而焚之鄧妻慈善先覺兮甘殉節而
不移俗傷焚災於往昔兮爰弔烈女於今時斯二說之竝
著兮皆野史之所遺無明文以為徵兮將然乎而豈其惟
九土之殊風兮俗自仍乎遐荒雖無徵而不信兮要循習
而弗忘紀火把節於滇土兮亦景美而辰良豈以僻在南
服兮遂為採風所莫詳

鎮南州志

卷之十藝文畧賦

三

鎮南州賦

有序

舉人甘孟賢

姚州人

光緒戊子余忝居龍川書院講席課徒之暇喜從
州中父老遊諮訪山川景物風土民情蓋入國問
俗之意也是歲六月既望苦雨連朝十餘日杜門
不出檢閱州志興有所動因撮其軼事並夙昔聞
於父老者挑燈研墨走筆書成律賦一篇以紀見
聞工拙不計

濮夷故國兮舍舊疆內分四界外列三鄉為姚安之屏障
實威楚之關梁割據久經夫蒙段分爭迭見於漢唐版隸

滇雲宏開地軸星輝井鬼彩煥天章爾其清水東流旗山
北峙鸚鵡崔崔馬龍瀾瀾石犬吠而野人驚金雞鳴而山
客起人來打雀路轉一十八盤江繞長虹波奔幾千萬里
登天臺而遠眺會逢採藥之仙聽響水以高吟不見詠蘭
之士若天煙鎖柳橋香飄桂井米汁滌澗石門嚴整風回
苴水之波月映寒泉之影扣石鼓以尋聲登金峯而賞景
雞和尚有故城龍角磨於高嶺壘遺漢相兮荒涼石化女
嬰兮俄頃雲林疊翠吟成摩詰詩情煙樹來青描入郭熙
畫境至於金湯之固城郭爲先地稱雞邑門號龍泉移建

自有明之始增修於嘉靖之年置學宮於南郭倚書院於
東偏州署宅於中臨往來之大道行臺在其左供匱乏於
名賢鎮水塔高吁嗟廢矣亞魁坊古屹立依然若乃陂堰
之修驛亭之置雙樹婆娑千工修治阿雄自是雄封英武
宜修武備水井與水盤齊名沙橋卽沙卻舊地瞻高峯之
峭聳幾察奸民眄東浦之澄清開通水利至若橋成鐵索
村有木瓜過三元之略約覽雙甸之人家長壽長坡虹腰
綿亘新村新堡鳥道橫斜野水多情塔白兮倒涵片影蓬
門無事土紅兮遠映流霞見性山高棲仙寺古指月名庵

白雲在戶享廣福於空門參天乘於淨土忍汚作祟可笑
油神化骨醫瘡空逢呂祖登層樓而晚眺萬家之烟火當
前人石洞以幽探半壁之崕呀可觀士攻利藝民務躬耕
蠶桑稀少黍稻充盈惟南方之士瘠適異國以營生力學
文人每聚徒而教授清齋女子恆待字而守貞到門則拍
拍有聲黏紙之工甚巧過市則丁丁送響鍤鉛之藝最精
春秋令節冬夏佳期古風未遠樂事相宜元旦登西山以
讌集暮春詣東嶽而禱祠冬至陽生比戶都嘗餐餌清明
墓祭荒郊徧折柳枝泥黑泉温遊人如織山高路險過客

所危若夫善政覃敷編氓戴德鄒牧廉明岑君怛惻陳元
不愧循良翁甲亦稱正直周國庠賦薄民安張倫至徭輕
訟息更有尹錢盧馬萬戶蒙恩方之召杜龔黃千秋生色
地靈人傑化洽政通賢豪代作文藝相雄科第以陳劉爲
最端方則歐許相同張象乾緬甸尋親歷艱危以致孝王
用之邊州仗節遂慷慨而全忠文學推魏許張陳清才獨
擅節孝重楊梁陳漆大義可風則有菜號雞羹齒名虎掌
竹鼠登庖花魚入網植蕎稗於山田種稻梁於平壤南鄉
陶器有勞邑之懋遷山寨粗麻惟夷人以績紡邊城雖小

勝蹟孔多遺編細檢濃墨新磨成俚言於永夜寄逸興以
狂歌且將風景城池聊供抒寫豈謂山川人物盡此包羅
也哉

賓興告示 補遺

知州李毓蘭 四川遂甯人

辛卯秋闈芝軒李公為州生舉行賓興備齋尊開鹿宴分鶴俸勵鴻才為鎮南從來未有洵盛舉也是科李公王器士麟即于四川鄉闈中式今將手創告示錄列志乘以見愛士憐才之報云

為賓興事照得金峯登翠夙多靈秀之儲桂井浮香早卜

科名之兆 鎮南八景有金峯曉日桂井浮香 人遊竺國千佛會逢客到奎

樓五星照應 城西有三國寺會逢山昭應山按州志知州陳元曾建奎神於南城樓 盼虹江

鎮南州志

卷之十藝文畧賓興

三

兮彩炫光爭韓海蘇湖覽象山之雄奇自小曹牆買壘江

象山詳 州志 城名石鼓交成而響自淵淵河產金珠賦就定音

傳曲曲 漢置石鼓城即今之石鼓村地也州屬有金珠河 惟宏開夫勝地自蔚起

夫文風矧乃水現白龍邑騰黑馬 白龍河黑馬邑俱詳州志 石呈佛像

毓秀非常 州東有石洞中有一石如佛龕深不可測 洞隱仙人鍾靈特異 按雲南通

志州東一洞南詔人王載元張明亭於此仙去故名 玩寒泉於月下疑到廣寒之宮

寒泉夜月屬州之八景 盼飛閣以青來 來青閣距城一里詳州之鸚鵡山地 共幸青

雲得路詩工垂柳楊狀元佳句堪尋 且力道中有楊升菴題垂柳詩詳州志

昌日無心呂道士妙言可晤 按志載呂祖行呂河地方與人詩酒言歡頗行人間姓名

答曰吾名無心昌。數十丈關名鸚鵡。州西關名凡鳥尚解誦經二百年。

河號馬龍。州水盡歸馬龍河詳州志多士定知學易。鎮南雖漢夷禱處。

文教已漸次就興。陶方寸性情。山堪見性。辨百千音義。碣

可觀音。見性山觀音碣詳州志登臨十八盤山。盤山屬州北界志擬倚天拔

地。憑眺三層樓閣。三層樓在署側心期聳壑昂霄。學龍角之琢磨

州有山曰龍磨角。在城北十餘里。今跡尚存。同仙骨之寶貴。州東有仙人骨塚觀蜡梅

而賞興。喜兆花魁。蜡梅村屬州地步天臺以適情。小天臺山在州東四十里地

思登瀛海。讀書於龍川座上。早徵經史。羅胸授管於雞和

城中。龍川書院即今州城書院。雞和城即鎮南昔為樸落蠻所建定有雲烟滿紙。本州

鎮南州志

卷之十 藝文畧 賓興

早

手承祖硯目誦父書。童子何知即采芹於魯泮。後生可畏

旋食餼於虞庠。九次觀場。頻勞折桂之斧。卅年伏案。但拈

貢樹之香。十餘載貢玉論珠。天子許為司牧。二千里囊棊

携鶴長官。猶是書生。雖案牘勞形。久廢雕虫之技。而詞章

潤色。猶存窺豹之心。當茲時近秋闈。士子觀光志切。爰卜

六月十二日。啓明鏡之舫。開聽雨之廬。廣福閣前。徧延修

士。懷清堂裡。待賞奇文。鏡舫聽雨廬懷清堂皆署室。廣福閣與州署止隔一墻授鵝

毛以為臺。看汝潤憑清水。碎犬石而作硯。盼君洗向溫泉

鵝毛嶺。清水河詳州志。州南有溫泉。經冬不寒。遠近男女

皆就浴。城東有石吠山。因山石形如犬。故名。碎其石可以

療瘡詳

川志 露冕吐鴻才勉副人

山斗州北有斗閣

覽裳

粉署儼如天上神仙

州西有神堂詳州志

神 憶昔西蜀窮經入室慕

文翁之治

余本蜀籍昔文翁為以石室藏書使子弟

蜀郡太守大興文教迄今

滇南作吏題橋想司馬之才

昔橋相如過蜀西駟馬橋曾於柱題曰此行吾不得高車

駟馬不復過此橋矣果驗

凡爾貢監生員務

各如期畢至鰲登學步魚

貫太門坊上亞魁思將遜汝柳

旁學士快與為徒

署前有明時亞

魁坊至今尚存昔楊升庵先生在苴力鋪柳旁題詩

或文如洗泉之晶瑩或筆如石

門之挺峭或食古能化恰似龍化石間或乘盛和鳴直同

鳳鳴院裏

洗泉石門詳州志沙橋有鳳鳴書院城南有龍神石志載有龍現巨石化作嬰兒啼

光燄

鎮南州志

卷之十藝文畧賓興

聖

若雲臺織錦幻成五色文章音韻似水盤滴珠譜出千般

律呂

雲臺山水盤鋪詳州志

但須理挾朱程之奧河流水響會其源

詞追蘇李之逸石吠山鳴續其調

響水河石吠山俱詳州志

風生腕底

聽金雞報曉之聲虹貫胸中吐天馬行空之氣

金雞山天馬山皆州

屬山

三十里村名太乙

城東有太乙村距城三十里

照讀不假螢光數

千條河號伯魚斷世定多鯉訓

伯魚河屬州東地

生等各奮英武

莫讓阿雄鎮南三鄉一曰英武一曰阿雄一曰永甯

繳卷立限未申澄心以評

甲乙龍潭月滿卜龍頭奪錦之祥羊碕秋清占羊角搏風

之兆龍潭有六處詳州志州北有羊碕羊入由黑井出焉

裏家山好定許黃石重逢

紫甸河清應教紫芝之再產。黃家山紫甸河詳州志本州願分鶴俸預

賀鹿鳴槐閣集大智之英桂筵啓樓仙之會。大智閣樓仙寺詳州志

試看三元橋上何人兆出元霄五鳳樓中幾輩聲蜚鳳閣

三元橋五鳳樓詳州志

詩

舊志三十八首增補七
十首凡一百零八首

垂柳篇

苴力道
中作

明狀元

楊

慎

新都人

靈和殿前豔陽時忘憂館裏光風吹千門萬戶旌旗色九
陌三條雨露姿蒼涼落日籠煙甸縹緲宮雲覆京縣芳樹
重重歸院迷飄花點點臨池見臨池歸院總仙曹應制分
題競彩毫詔乘西第將軍馬詩奪東方學士袍金明綠暗
留煙霧舊燕新鶯喚朝暮只知眉黛爲君顰肯信腰肢有
誰妒從此沈淪萬里身可憐憔悴四經春支離散不甘時
棄攀折荒庭委路塵搖落秋風上林遠婆娑生意年華晚
腸斷關山明月樓一聲橫笛清霜坂

鎮南州志

卷之十藝文畧詩

三

傷楊柳

有序

明巡按御史

鄧

漾

垂柳篇者楊太史自悼之作也作於苴力題於捨
資予讀而悲之作傷楊柳仍用其體云

建章宮中春早回太液池邊雪後栽飄花婀娜隨風舞紺
幄玲瓏映水開綠條縹葉參差布乳燕新鶯往來度自許
風流張緒年誰誇豔藻枚乘賦豔藻風流此一時禁地長
承雨露私詩成玉塵偏驕賜宴出飛龍許借騎霧縷煙絲

聚還散玉階幾歲留珍玩有時三起復三眠不悟五晨經
六旦搖落秋風奈別何遷斥炎方歲月多少府一生嗟偃
塞子山獨坐歎婆娑

英武關望諸山雪

鄧漢

英武關頭早行客北風林葉飄蕭城高原夜雨生曉寒金
秀諸峯雪盈尺九疊橫舒雲母屏千里照耀銀沙積憶從
北土賦南征歲月常歌苦熱行圍爐集句思兒女買棹臨
流憶友生憑軒忽覽瑤華色腸斷芳茵角枕情

石鼓山

鄧漢

斗大雖稱郡由來形勝多山橫白鹿地水接蜻蛉河里社
開喬木人煙枕曲阿遺風問南詔猶自說雞和

路過石鼓山

卽舊石鼓縣地率筆偶成

國朝知州

李毓蘭

四川人

銅鼓創由漢孔明此間石鼓自天成山城已圯人稱縣酷
似春秋鼓邑名

路過伯魚河顧名思義題句誌感

李毓蘭

不聞鯉也向茲生竟仿伯魚著盛名河果有靈人自傑勉
憑詩禮紹家聲

過東界太乙村誌感

李毓蘭

問姓村原不氏劉焉能太乙照書樓從來未見青藜杖
博嘉名總是浮

英武關雨行二首

明提學人敘事 張佳印

曉渡英武關石徑雲中立山鳩高樹鳴雷雨轉呼吸平疇
響流泉紫芝之行可拾茲土况恆陽權聲動簞笠喬松概高
清蠻煙習行色僕夫風嚴駕征鴻渺難極山空嚮鷓鴣徒
倚巖洞黑曠哉江上懷浮雲起東北

仙人骨

明分巡道 皇甫防

昔人自羽化枯骨倘安存青塚藏金藥難招緱嶺魂

前題

明庠生 丁大訓

五樓峰下紫雲關鶴馭秋風甚日還白骨不隨雞犬去至
今遺脫滿空山

苴力鋪

國朝 吳銘道 貴池人

苴力橋堪憶曾停戍客鞭細吟垂柳句愁絕落花前陳迹
從榛莽空山白歲年何人萍絮似猶自感風煙

鸚鵡關

吳銘道

亂菁槎牙黑霧深山行那復辨晴陰低低茅屋過溪暗面
面長松激浪侵鳥道一痕殘壘斷人煙幾處夕陽沈滿林

鸚鵡能言語故作
愁聲滯客心

過鸚鵡關偶作

李毓闌

天生門戶鎖西頭
鳥唱關危壯客愁
此日南來冠履士
猶聞鸚鵡誦經不

呂閣四首

吳銘道

南詔時王載元張明亭樓止鎮南之五樓山呂先
生過之相與沈吟其詩俱別載臨海馮司寇守威
楚時樹坊誌之且為記

欲學神仙恐未真
玻璃風裏拂紅塵
曾聞東老榴皮字白

鎮南州志

卷之十藝文畧詩

吳

酒能留回道人

橫江煙水草青青
千載人還可姓丁
我欲誅茅向呂閣
五樓山下讀黃庭

一劫偏遲萬化身
塚中枯骨解醫人
山青雲白淒涼處
誰向桃源再問津

盧生已熟黃梁枕
賣菜先生真未真
華表青題數行字
天臺山外再來人

呂閣驛遊觀偶作

李毓蘭

神仙不把姓名揚
詩酒沉吟水一方
千年閣號無心口
去

後方知妙語昌

仙人骨

國朝舉人高慎州人

攜筇登嶺覓仙踪採得靈砂滿藥籠但使時人無天札五樓應作老人峯

尋仙人骨瘳疾

國朝訓導李猶龍

二子求仙忽遇仙張子去兮王子還道中自恨失奇緣因留遺骨石鼓邊而今不獨野人傳名人亦曾著簡編我來尋之掘山巔碎石渾如朴硝焉朴硝非骨古為然忽為貼體沈疴痊吾人格物實所先莫捐靈石羨函玄君不見自

鎮南州志

卷之十藝文畧詩

七

古上哲與名賢不探隱不言怪至今唐史內猶存佛骨篇

過仙人骨塚

李毓蘭

山人羽化焉存骨偏說坐臺夜有輝遂令欲求仙術者迄今妙想入非非

苴力鋪

國朝督學吳自肅

蒼山一片石遙思達帝鄉道遠終難致棄之委路傍異物誠堪貴民勞實可傷今看石已碎相對亦徬徨

苴力鋪懷楊太史

國朝楚雄郡丞馬天選

撼門抗疏豈為狂竟爾批鱗戍遠荒翰苑坡仙窮嶺海漢

廷汲 邠老淮陽投囊絕句驚神鬼荷鋤豪情典驢驢試看
行吟分踏處山花山草有餘香

傷明太史楊升菴先生題

直力道中
垂柳篇作

李毓蘭

白石先生句雞和柳亦香至今人學步太息狀元楊
路曲心傷絮條攀鬢惜霜蠻花同犵鳥合貯一詩囊
抗疏架門撼謫荒驛路長青垂容寫意豈爲掛冠狂
金碧荒烟護雲陰瘴雨嘗天留名士韻隱爲諍臣傷
壁匪紅紗照名爭綠柳芳龍池今萬里幾鑿路淒涼
二百年來後詩場復戰場興衰知幾易逸韻獨堂皇

鎮南州志

卷之十藝文畧詩

吳

仲夏課農西郊

國朝知州

李續祖

鐵嶺人

片瓊冬夏亦何求巢處昏昏盡拙鳩獷俗偷生井地錯情
民卧食水田收撫循自古無良策保障於今更弱謀兩載
憩憐懸馬首那堪風鶴警滄洲

山行卽事

陳元

二月榴紅映碧峯醽醽薄酒醉花叢雲遮古道千山外人
在羊腸數曲中飯熟不嫌噉小米園肥偏愛摘雞縱開來
偶話南州事苗獮猶知有卧龍

遊見性山池園席地小酌

陳元

疑是蘭亭曲水傍呼朋快飲鬱金香老僧亦解杯中趣故折花枝侑一觴

夏至前一日偕友人率兒鎬文冒雨陟小天臺山

陳元

萬松都是老僧栽更愛修篁映碧隈一片白雲啼鳥處遊人浪說是天臺

遊小天臺回馬上聯句

陳元

何處飛來一赤城

古愚

芊芊瑤草傍雲生

塗融庵

蒼山摩

頂松千樹

何賦梅

玉洞傳觴酒數觥

李殿英

採藥劉郎偏

鎮南州志

卷之十藝文畧詩

四九

未到

男鎬文

長齋蘇晉扯同行

天臺僧性善

歸來幸值黃

梅雨

融庵

勒馬殷勤且勸耕

古愚

官衙入詠

有序

陳元

元天下之至愚者也故所在以愚名署後有隙地三畝屋半椽題曰愚公圃圃之東花木叢雜伐去數株中構一軒曰寤花園之西南隅邱阜高丈許歷為堆積瓦礫坏墮之所因即其地而培以土砌以階誅茅結舍名曰一撮亭亭前編竹為籬曰茶蔬架下鑿一潭貯水數斛畜魚數十頭鐫曰半月

池署之前楹曰濮落巒院院頗空闊塏爽予於頽垣下偶拾得怪石數種壘壘成山可臥可坐可立川堂右甚逼窄有室不能匡牀顏曰芥子窩上供呂道人像暇則蒲團兀坐棲真養納凡此皆愚公之所為也愚公不能詩而喜作詩撰官衙入詠以就正智者

不工巧宦競時趨抱甕窺園且自娛假令柳州來牧此八愚詩就又添愚愚公圃

百花陽裏一愚公手結茅亭對碧峯傲骨那堪牛馬走子州

鎮南州志

卷之十藝文畧詩

辛

署門聯有牛馬一官之句呼童跨鶴入花叢繞花軒

六一徜徉歐居士二三倡和韋蘇州蒲團趺坐白日靜貌

焉姑射在城頭一撮亭

天枝無力鬪春風斜倚闌干十二重絕似江都金帶芍一時花朵作三公茶蘼架

魚甯非我我非魚濠上逍遙樂自如性癖由來耽莊子一篇秋水枕中書半月池

珠璣咳唾賁當途杏苑風流壓細奴南詔封細奴羅於此四處絃聲

霏玉屑試聽石鼓也歌呼濮落巒院

袖中拾得米家珍雞足嶙峋似逼真鉄石心肝相鼎峙假

山原不礙真人石假山

兩腋風輕不惹塵十年官冷一瓢新此間安樂窩誰賞知

我無心昌道人芥子窩

和古愚先生遊見性山池園席地小酌

李筠

使君選勝綠陰傍坐處應聞三日香陪賞名花詩未就罰

依金谷醉飛觴

前題

塗暉石屏人

跌坐蒲團流水傍擎杯花落酒生香風流太守分題詠詩

滿奚囊春滿觴

前題

舉人陳士修州人

覽勝驅車曲徑傍風吹桃李一天香山城處處皆春色謝

傳情閒應舉觴

和古愚先生夏至前一日冒雨遊小夫臺山之作

塗暉融庵

蓋竹披離煙雨過老僧閒擁白雲窩寒山原自文殊派莫

厭豐于饒舌多

前題

庠生 李 轅 殿英 昆明

天臺自此休云遠天未今開天姥峯不是使君多索和誰
人遙指二林松

前題

陳鎬文 元之子

迷離風雨伴人行酒半酣時詩未成恨不攜來孫綽賦擲
將此地聽金聲

和愚公圃

涂會畿 未詳

政閒繁圃碧雲中柳柳韓潮領郡同賦草百篇清入骨風
流當代幾愚公

鎮南州志

卷之十藝文畧詩

五

和繞花軒

舉人 劉 鑑 楚人 楚雄

花繞幽軒日正遲陸離畫出一亭詩坐中漫挹西山爽更
有天香泛酒卮

和一撮亭

許點山 未詳

亭高一撮望無邊坐對城頭姑射仙四壁鄰聲皆蠻語朱
呀西尺閣窗前 土人呼雨曰朱菜曰 呀柴曰西油曰尺

和茶藤架

塗 暉

俸錢半是折清風曲塢空盤翠幾重最是名花開綽約籠
煙罩月伴愚公

和半月池

塗會畿

滿院無塵地自偏片池苔蘚綠漪然常留明月次鱗樂更
貯清泉照碧天

和濮洛蠻院

進士 蔡 醇 浙江人

鸚鵡亭前看鶴舞仙人石上聽琴鳴莫言蠻院歌聲少石
鼓無聲政有聲

和石假山

庠生 孫逢吉 餘姚人

醒石嵯峨醉石橫醉時枕石醒時行養成邱壑夔龍質莫
負東山安石名

鎮南州志

卷之十藝文畧詩

五

和芥子窩

太 空 小天臺僧

百丈金山一點拳十萬須彌一粒芥旋乾轉坤君自如雙
手擎天莫道怪

題州署三堂花臺上古梅一柯短小古幹七律二首

李毓蘭

尺地居然占古梅孤芳自賞耐人猜如甘冷署同蘭臭似
學孤山繼菊開氣概幸叨天琢鍊心腸喜託地栽培休嫌
樹小憑依薄終是和羹待用材

臺卑土淺幹縱橫錯節盤根晚始成骨傲能經風雨試形

單不懼雪霜侵枝當極瘦尤堅定花到奇寒倍潔清不信
尚多喬木在誰堪松竹共芳名

春日同友遊楊嘉寺

庠生 丁燦南 昆明人

浪跡難和值幾春郊園踏翠賞芳辰參天黛色松如蓋滿
地綠雲草作茵興逸數多金谷酒情閑如入輞川濱逍遙
不忍辭花去留句相期再問津

秋日登昭應山遇雨即景

丁燦南

鸚山高登鎮城秋此日登臨紀舊遊綠野趁晴千頃秀清
流帶雨數灣幽雲煙幾度閒舒卷詩酒多情自款留名岳

鎮南州志

卷之十藝文畧詩

五

攀緣知有待眼前興到即滄洲

秋夜至鵝趕廠野宿

知州 葛慶曾

服官無暇日策馬入荒山路僻人煙少林深鳥獸閒月光

秋皎潔金氣夜爛班自嘆何為者茫茫木石間

臘日喜麗辰

葛慶曾

山城久寂寞忽喜故人來話舊三更月思鄉萬里杯操觚
存古道抱瑟遜時才欲折梅花贈寒香不忍摧

雞和城懷古

府學庠生 嚴 昭州人

羅蠻勝地舊時城故宅荒臺草自生南詔當年封濮落只

今惟有碧雲橫

五樓山

舉人嚴正身州人

石鼓風煙舊鎮南青山猶有白雲庵數行短句橫秋雁幾
點殘棋帶曉嵐俯仰乾坤非睥睨縱橫詩酒任沈酣登高
別有襟懷處夢與仙人一夜談

金雞山

副榜高爾伯州人

聳峙近城郭金雞唱昔年至今天籟響猶似餘音傳

遊來青閣

知州蘇世勳廣東人

卽此是丹邱普陀絕頂游誰携謝眺句同上庾公樓一閣

山開面千峯石點頭不堪將盡酒鱸膾又思秋

卸篆後遊來青閣留別周生銘

知州景堯春興義人

得謝蛟肩心極樂振衣直上來青閣一城煙火望中收四
野風光杯底約爲學已經費苦辛入官更覺多盤錯吾徒
莫負我相期浪說雞羣難立鶴

三月望後因公赴南鄉

知州彭衍埤廣東人

日行千壘障路繞萬松中煙翠浮青綠野花放白紅鳥聲
風剪碎山碓水春空雲裏聞雞犬人家何處通

擬垂柳篇

舉人夏丕彰州人

沙水橋邊三月時，直力道旁春風吹。花飛夾岸流雲合，陰
滿沿途清露滋。天上星光照芳甸，人間晴絮罽鄉縣。翦刀
葉底頻頻裁鶯燕，枝頭深深見新都。公子本仙曹，薇省得
句揮彩毫。風騷裁出樹，赤幟兆叶染衣奪錦袍。一朝萬里
走煙霧，美人拓落傷遲暮。乃知受忌不受憐，何計相容與
相妬。高樓寫韻寄閒身，芳樹婆娑幾經春。欲尋殘碣知何
在不復，柔枝颺麴塵。懷人徒悵風流遠，悠悠我思恨生晚。
遙想當年吟詠處，幾次消魂過長坂。

遊龍磨角巖

訓導
李毓芳

石屏人

石鼓城東勝景多，傳聞龍角古來磨。人扳鳥道尋芳至，路
闢蠶叢載酒過。眼底風光雲出岫，源頭活潑水盈科。泉流
山下清如許，且聽農家報賽歌。

初次遊龍磨角山七絕一首

李毓蘭

青山一日幾晴陰，角影縱橫自古今。料得當年磨厲處，猶
餘風雨助龍吟。

重遊龍磨角山七律一首

李毓蘭

神物奚煩苦切磋，今看奮勵過人多。搶頭儼爾知攻錯，扣
角居然解琢磨。妙跡有靈光石嶂，仙痕入畫顯巖阿。潛龍

未遇才先鍊較勝鴻儒自責苛

攜諸子遊龍磨角山作歌誌勉三十六韻

李毓蘭

神龍有角豈須磨磨向人間意欲何似恐凡塵仙骨浼不
甘靈物老煙蘿如珠如磨經百鍊工夫什倍名山彥仙掌
劃殘綠與青佛面研若鐵穿硯因思修士磨光日日覩仙
痕心亦羨羸角能爭日月光搶頭頓令風雲變我看情形
幻忽真人誇跡幾幾經春或稱刮比犀牛利或說觸頰獬
豸均幾時磨就幾人見事近荒唐語捷便但見螺髮古跡

鎮南州志

卷之十藝文畧詩

七

新僉云龍實開牛一面吁嗟乎不到龍宮遊那識龍工妙不
向龍門登那解角光耀寄語蓬山奪錦人磨礪須學龍知
要心切登龍併力爭益磨益久益光明晴光一點飛天上
猶是當初砥礪精角上靈光山上呈回頭俯視渺鯤鯨興
雲作雨渾無迹雷掣雷鳴萬象驚土本河間鯉如龍待晚
成從頭先利器轉瞬已前程相期燒尾成佳士治已當嚴
治角情才智不經磨與鍊除非英傑盡天生願後學細權
衡龍猶奮土漫輕休誇頭角素崢嶸不憑刮礪不堅貞山
寂寂石硜硜試看古今名巨卿不是曩時勤刻礪安能品

地自晶瑩品地晶瑩心跡清磨成千古不磨名四顧不知
龍何在空山依舊日光榮

秋夜學署觀書驟雨

訓導 羅桂林 安甯人

忽訝雙扉啓斜飛入電光銀燈全暗影金桂遍浮香雜座
蕉聲急敲窗竹響狂呼童勤執燭曾否溼書床

過黑馬邑河

廩生 郭容 州人

曲曲穿林下迢迢度嶺餘隔河山路盡抱谷水田斜樹影
搖青嶂溪痕皺白沙橋頭入畫處茅屋兩三家

遊竺國寺

增生 劉承基 州人

鎮南州志

卷之十 藝文畧詩

五

寺近城西麓鱗塍次第過半潭明竹樹一徑入煙蘿院種
新花少廊堆舊瓦多老僧留客興酒癖未詩魔

冬日信步出郭至蟠龍寺

舉人 陳以忠 州人

披暄游北郭乘興度寒倚白石明蒼澗青溪入翠微日飛
翻鳥背雲碎補僧衣省識龍蟠處應從佛鉢歸

遊蟠龍寺

舉人 張鈞 州人

山外又青山清溪度幾灣巖懸穿霧鬢寺古人煙鬟地靜
人聲寂林空鳥語閒暈花看未了落日又催還

遊來青閣

貢生 陳其湘 州人

日暖東南路風清佛寺門層樓依樹杪野水沒苔痕地僻
煙蘿結林幽鳥雀喧閒情尋世外對此倒芳樽

遊西山寺

進士 劉鍾璟 州人

西山入望翠微招路出層城路尚遙白水灣中人影互綠
陰深處馬蹄驕泉寒映月潭三尺峽小通風卷一條躡級
還經峯頂下琳宮已自鬱岿

平橋煙柳

進士 陳封舜 州人

平橋經野渡卧浪漾晴暉柳絮鋪煙密花萼帶露肥山光
迎旅轡曙色點征衣勒馬遙觀處雄州隱翠微

鎮南州志

卷之十藝文畧詩

三元

前題

廩生 張福貞 州人

一望城西境煙絲雜柳絲橋平官道闊岸迴野田敲驛路
聯征旆林梢掛酒旗離情如此樹莫漫笛聲吹

前題

拔貢 徐登榮 州人

橋外澹煙絲橋頭楊柳枝君看煙柳際中有古別離

金峯曉日

張登達

峯頂鳴金雞峯邊上曉日雞聲曉色中金光動文筆

寒泉映月

萬鍾英

寒泉清無滓寒月共千里夜夜匯虛明靜中藏妙旨

古城煙雨

增生 郭凌霄 州人

雨細復煙輕 今城望古城 高原多瘠土 幾處樂深耕

珠盤疊翠

龔長青 州人

空翠濃無著 大珠小珠落 疊疊走盤間 付之山靈托

鸚鵡來青

庠生 劉肇唐 州人

山青來遠眺 鸚鵡收眾妙 爲語慧性人 莫受青山笑

重遊竺國寺

貢生 陳矩 州人

重來遊野寺 因憶舊時花 地僻人聲寂 林幽鳥語譁 犬迎攜酒客 僧獲落巢鴉 樂聖啣杯久 歸來趁月華

鎮南州志

卷之十 藝文畧詩

卒

過直力鋪

徐嗣階 州人

此地滄桑屢變遷 我來剛遇菊花天 盤山直水依然在 不見先生垂柳篇

鎮南西郊春遊

甘孟賢

參差楊柳短長堤 放眼春郊望欲迷 且喜晴和人意好 東風吹我過橋西

尋春一路繞河行 河水潺湲春鳥鳴 十里青疇平似掌 村農幾處事深耕

丁亥季秋遊見性山三首

甘孟賢

一徑穿雲入幽林曲折經古藤鈎帽落松翠染衣青流水
鳴寒玉危峯列畫屏閒中能見性物我兩忘形

乘興尋山寺行行入遠林到門無犬吠穿徑有蟬吟泉水
添茶味鐘聲送梵音細參清淨理花鳥見禪心

祇園清絕地松竹滿山坡徑僻來人少秋高落葉多酒闌
詩未就林靜鳥還歌尙有殘經在無須白馬駝

九日遊見性山讀舍第應篋壁間舊作有感

甘孟賢

詩題壁上已經年風雨推殘墨尙鮮好句常留蘭若地遊

鎮南州志

卷之十藝文畧詩

空

人共賞菊花天

應篋以丙戌
九日來遊

雪泥有跡誰能認雲樹無情

我更憐紅袖拂塵難再遇漫將高詠繼青蓮

冬至後遊見性山夜宿禪房偶作

李毓蘭

冷氣透窓紗禪房靜不譁霜風催去雁雪月照啼鴉性理
空中悟仙山象外華觀梅頻想像故國放銀花

寶座塵氛積金龕燭照斜苔深留屨齒月滿漏簷牙木落
鴉爲葉潭清鷺作家滇僧閒懶慣沒見木魚搨

雞和十詠

有序

甘仲賢

余自光緒甲申主講龍川書院三年於茲風景人物

粗知其概丙戌冬纂輯備採志略一書稿成賦小詩
十首附諸卷末聊以寄興覽者助焉

問俗雞和地窮州舊有名稼收農亦賈水暖士先耕饋餉
資錫餌歡呼飽滫羹唐風原近古蟋蟀句重賡

驗侯雞和地温平一味長冬無絲亦暖夏不葛而涼陽氣
晴借至寒威雨借將江邊秋瘴起惟有阿雄鄉州南阿雄鄉小江河

一帶六七月間有瘴氣

繪景雞和地層樓臺暮煙山隨城起伏隴併路鉤連偏仄
中通市欲斜對列廛城西光景好鸚鵡夕陽邊

鎮南州志

卷之十藝文略詩

全

覽勝雞和地羊腸十八旋

州西有山自麓至巔廻旋十八疊名十八盤山

山雖能

見性

見性山在州西

寺早不棲仙

棲仙寺在城東五樓山上久廢

泥黑人還浴州南

有黑泥温泉人多就浴

河清水自潺

清水河出城西

空林聞犬吠

州南有石吠山相傳

昔有石作聲如犬吠故名

怪石裊秋煙

懷古雞和地空嗟樸落夷

州志作濮落非

昌無心已去仙有骨誰

知用王載元張明亭故事

劫化銅鉦少

州南有雄關有諸葛營土人掘地獲銅矛鉦鼓之類

文

湮石鼓移

石鼓縣在州東三十里今廢為鄉

古城煙雨歇

古城在州東南二里即和子城

也但見草離離

憑弔雞和地庚申恨閣吞

咸豐庚申城陷

濁塵籠穴舍巨禍起花

門碧化青郊血斑留翠竹痕秋風吹野草燐火溼黃昏

設饌雞和地駢羅野味豐撐腸容虎掌

虎掌菌味芳烈果同治初始出

腹愛雞蓼粟草香堪採荷囊豆亦充

州境產大扁豆俗名荷包豆

山蔬

多且旨底事說秋菘

旅宿雞和地荒涼靜不譁剪燈扁戶牖望月拭窗紗秋到

砧先急宵長析又加幾回欵枕聽嘖嘖動長嗟

爲宦雞和地城居四達衢朝朝車馬驟夜夜節符趨大吏

疲迎送胥徒慣走通吁嗟東道主莫謂在邊隅

耕舌雞和地勾留歲月深愧無雕鑄手徒抱化裁心往事

逢人問名山結伴尋圖經閒檢閱危坐伴蟲吟

補遺

州西沙橋驛鳳鳴書院碑序

李毓蘭

爲刊垂永守事竊維書院之設所以萃地方俊秀而造就成材如百工之居肆以成事也然必籌有講習地有束修資乃可合貧富而胥沾教澤以歷久而不廢州西二十里許有沙橋前數年興設鳳鳴書院詢其地則藉文昌廟小屋數椽以作講席東修膏火悉由肄業諸子自備惟先年有樂施者送入街房一所年可收租息十數金又於斗會所建水碾處分息十數金然皆兵燹後無從籌措權宜從

鎮南州志

卷之十藝文畧碑序

四

事焉今查水碾地基乃故武庠余惠今文生光祥父送斗會尺寸之土嗣光祥見利生心輒忘鯉訓而作雀鼠爭前易任遂封碾以息訟厥後紳等復請歸書院易公因其有益學校復俯從之究屬勉強遵實非心說誠服也光緒辛卯春余生光祥以祖母歐氏具詞呈控請於上流處另建一磨意在乎截水以奪利然禁之則送一地而業不由主以後誰肯樂施允之則磨在前而碾徒空懸於公毫無所濟第聞光祥家素豐可勿需此余乃從容解勸動以興學獲報之因曉以父死無改之義余生色頗沮赧赧然有

悔悟心復令夏生文衡余生學聖會同呂學博嘉爵郭文
庠兆燿迎其機而導之曰吾子身列膠庠何妨捨已施之
閒地培可造之人材乎何必爭不需之微貲廢將興之文
教于余生旋商諸祖氏欣然許歡然諾余曰有是哉余歐
氏之祖孫抑何深明大義也氏青年守節今七旬而精神
猶健爰獎以貞節延齡四字余生復請錫銜名賜鈐印思
額其匾於門余固樂爲予之俾鄉人知好義之可風而樂
施之堪表也至此而水碾永爲書院有矣有之而水碾年
收之息與街房年人之租已可助書院大半經費矣惟尋

源溯委此碾由斗會而來文教當興神祀亦何可廢復令
將水碾所出分四成以幫斗會紳等益服其公爰爲碑而
請予一言爲序余曰幸哉前數任未解之爭示平之訟竟
由我而默化潛消哉人咸異余氏趨利之心何一旦而轉
爲好義之心吾特異好義之心乃出於歡欣鼓舞而毫無
所強也倘由此而年不停館歲不廢學於以延名師培後
進沙橋子弟講習討論以致其精親戚姻屬以作其氣安
見漢夷襍處之鄉朝漸夕摩不可希鄒魯之俊彥濂洛之
英賢以蒸黍日上耶所尤冀者勿假公而濟私勿有名而

沒實勿藉端而廢學勿勤始而怠終不惟予扶興文教之心爲之一慰卽余生光祥之目覩心儀不亦永無異議哉茲從衆紳之請特爲序厥由來斗會與文會并與此後文光齊射斗雲程由學程直上他年學士盡梯雲是爲序

夏烈婦傳

甘季賢

烈婦余氏鎮南沙邵邑人爲同里夏澤潤之妻澤潤少喪其母父受之再娶劉氏拚擋家務及婦來歸翁姑視其賢且能悉以委之婦裁冗緝匱秩如也澤潤人塾授學婦每激厲之兩試於有司皆見黜婦勗學益切時謂澤潤曰堂

上人晨昏之役吾自執之無煩夫子憂夫子奚爲而不勉勉歲在辛卯姑病瘰癧醫者云宜用藥水日再滌洗脫毒婦如法躬爲治之歷五六月無稍懈里人以其難澤潤夙有癩疾時發時愈未嘗以爲憂也時在塾中與同學燕飲誤食牝猪肉疾遂大作婦兩侍湯藥夙嚴莫戒旣煩且殆未幾姑病漸瘳夫病增劇婦惶恐無以爲計祈神問藥皆不效乃密割股以進亦不效於是懷刃入室將剖胸割肝以進而夫適逝婦痛失所天遂奔投於水家人救之力得不死婦有志未遂椎胸號哭哀動傍人見者莫不爲之淚

下翁姑度其終不欲生迺延鄰媪守之晝同處夜同寢防
維甚密然欲死其夫卒不能一日忘也術家謂死者七日
以外魂氣復返於家謂之回殺是日夜婦閉帷掩坐徘徊
不能寐起視窗牖間月影朦朧指謂鄰媪曰安得吾夫形
影隨此歸來耶媪曰無之幽明異路悵望徒勞夜深矣曷
就寢婦俯從之白是含淚無言默計是日其翁熬鴉烟釜
置室外餘瀝尙存俟鄰媪睡熟潛出取釜調水服之鄰媪
未覺也天旦呼婦同輿則已絕矣婦年十八嫁澤潤二十
一與澤潤同死後澤潤十日有奇

論曰婦人之義節孝並稱烈婦事姑之孝如此假令琴
瑟有終無悲鵠寡世猶且賢之迺天之挫折人之阻抑
曾不稍恕而卒以一死殉其夫彼士之立志不堅而二
三其德者視此可媿也或者謂烈婦之死難矣而侍疾
割股不愛其身以救其夫尤巾幗中所罕也然予謂婦
所重在彼不在此

